

Normativa específica para a simultaneidade do Grao en Administración e Dirección de Empresas e o Grao en Dereito

A Universidade da Coruña, no seu obxectivo de ofrecer alternativas de formación que melloren a oferta dispoñible, posibilita que un estudante poida cursar de forma simultánea os estudos de Grao en Dereito e Grao en Administración e Dirección de Empresas, mediante a proposta dun programa conxunto elaborado polas facultades de Dereito e de Economía e Empresa sobre os planos de estudos oficiais.

Para a posta en marcha do programa conxunto, resulta necesario regular determinados aspectos que contribuirán ao seu éxito, nomeadamente:

Art. 1. Autorización do programa: a Universidade da Coruña autoriza a posta en marcha dun programa de dobre grao proposto polas facultades de Dereito e de Economía e Empresa que permita simultanear os estudos de Grao en Dereito e Grao en Administración e Dirección de Empresas (en diante "Dobre Grao ADE - Dereito"), mediante unha ordenación temporal das diferentes disciplinas que se van cursar a partir dos planos de estudos oficiais e tendo en conta o regulado nos artigos seguintes.

Art. 2. Titulación que se obterá: os/as alumnos/as que superaren o Dobre Grao ADE - Dereito obterán os dous títulos oficiais de Graduado/a en Administración e Dirección de Empresas e Graduado/a en Dereito.

Art. 3. Duración do programa: terá unha duración de once cuatrimestres. O número de créditos necesario para superar o programa será de 396 ECTS, distribuídos da forma que se indica no ANEXO I.

Art. 4. Centro responsable das xestións administrativas do Dobre grao ADE-Dereito: co fin de facilitar as distintas xestións administrativas relacionadas co expediente académico do estudante, acórdase designar a Facultade de Dereito como centro responsable da súa tramitación e custodia, sen prexuízo do que está disposto no artigo 12 desta normativa para o procedemento de expedición de títulos oficiais.

Art. 5. Centro de impartición do ensino: o ensino das materias do dobre grao será de xeito independente ás materias equivalentes no Grao de ADE e no Grao de Dereito e impartirase cada cuatrimestre no centro que corresponder segundo as materias que se van impartir.

Art. 6. Número de estudantes: para o curso académico 2009–2010 ofértanse 60 prazas. Estas prazas detraeránselle ao 50% das prazas correspondentes á oferta do Grao en ADE e Grao en Dereito. No sucesivo, o límite será o que oportunamente aprobe o Consello de Goberno.

Art. 7. Admisión de estudantes

1. A solicitude de admisión para cursar Dobre Grao ADE - Dereito realizarase polo mesmo procedemento que para o resto de titulacións ofertadas pola Universidade da Coruña. Porén, para o curso académico 2009-2010 o proceso de adxudicación de prazas realizarao a UDC entre aqueles estudantes que manifestasen o seu desexo expreso de simultanearen as dúas titulacións. Este manifesto realizarase no momento de se matricular, ora ben no Grao en Dereito, ora ben no Grao en ADE.
2. Só poderán optar ao programa simultáneo aqueles estudantes que reúnan os requisitos legais de acceso e admisión para ambos os graos.
3. Dado que o Dobre Grao ADE - Dereito se vai introducir de xeito gradual e con grupos de docencia homoxéneos, non poderán solicitar a admisión para estes estudos aqueles estudantes que estean a cursar, ben o Grao de ADE ou ben o Grao de Dereito. Isto é, para aqueles alumnos que xa iniciasen un dos dous graos e desexen cursar de forma simultánea os seus estudos coa outra titulación, rexerán as normas xerais da Universidade da Coruña sobre simultaneidade de estudos, facilitándolles, na medida do posible, a súa adaptación.

Art. 8. Criterios de matrícula

1. Os alumnos de primeiro curso, que cursen estes estudos por primeira vez, poderán optar por

matricularse no réxime de dedicación a tempo completo, é dicir, da totalidade dos créditos correspondentes ao primeiro curso, ou ben a tempo parcial, segundo o que establece a Norma que regula o réxime de dedicación ao estudo e a permanencia e a progresión dos estudantes de grao e máster universitario na UDC: nunca inferior a 24, nin superior a 48 créditos.

2. Os estudantes de continuación de estudos deberán efectuar a súa matrícula en réxime de dedicación a tempo completo ou en réxime de dedicación a tempo parcial, respectando o número de créditos establecido con carácter xeral para todo o alumnado da UDC na Normativa citada: nunca inferior a 48, nin superior a 78 créditos e nunca inferior a 24, nin superior a 48 créditos, respectivamente.
3. De acordo coa norma de progresión aprobada na UDC, o alumnado deberá matricularse de todos os créditos de formación básica e obrigatoria non superados de cursos anteriores.
4. Os estudantes poderán desistir da súa matrícula de acordo co que dispuxer a Normativa de xestión académica que rexa en cada curso académico.

Art. 9. Permanencia e progresión: Número de créditos que se deben superar.

1. O alumnado de primeiro curso matriculado neste por primeira vez, deberá superar nese curso académico o número mínimo de créditos establecido na Norma que regula o réxime de dedicación ao estudo e a permanencia e a progresión dos estudantes de grao e máster universitario na UDC.
2. O alumnado de continuación de estudos deberá cumprir os requisitos de permanencia e progresión establecidos na citada norma.

Art. 10. Avaliación e número de convocatorias

1. A formalización da matrícula dará dereito en cada curso académico a unha convocatoria con dúas oportunidades de avaliación, que se realizarán conforme ao calendario académico aprobado, ou á norma que corresponda.
2. A avaliación realizarase segundo o establecido nas correspondentes guías docentes e as convocatorias de exame serán aprobadas e feitas públicas polo centro xunto coas de cada un dos Graos.

Art. 11. Incumprimento das normas de permanencia

Aqueles alumnos matriculados no Programa de Simultaneidade que non cumpran as condicións e requisitos de permanencia que establece esta norma deberán abandonar os estudos, de conformidade co disposto na Norma que regula o réxime de dedicación ao estudo e a permanencia e a progresión dos estudantes de grao e máster universitario na UDC.

As situacións de carácter excepcional suficientemente acreditadas que dean lugar a solicitudes presentadas polos alumnos do programa, serán atendidas polo Decano ou Director do centro xestor deste, quen resolverá por desconcentración do Reitor da UDC, tras o informe da comisión académica que corresponder.

Contra a resolución do Decano ou Director os alumnos poderán presentar un recurso de alzada ante o Reitor da Universidade, na forma e prazos previstos na lexislación vixente, sen prexuízo de poder interpoñer calquera outro recurso que considere e que permita esta.

Art.12. Abandono do programa de simultaneidade

1. Os alumnos que decidan abandonar o programa de simultaneidade deberán notificalo á Administración da facultade responsable da xestión administrativa deste, antes do inicio do período ordinario de matrícula.
2. Os estudantes, de ser o caso, poderán:
 - a) Optar, no prazo indicado, por calquera das dúas titulacións do Programa, sempre que teñan aprobados polo menos 12 créditos, se a matrícula se efectuou no réxime de dedicación a tempo completo, e 6 créditos no réxime de dedicación a tempo parcial, da titulación que vaian cursar. De non cumprir este requisito, o/a decano/a da facultade, previa petición da persoa interesada, poderá admitir a matrícula, pero neste caso o/a alumno/a deberá superar un mínimo de 36

créditos obrigatorios do primeiro curso para a matrícula a tempo completo, e 18 no caso de matrícula a tempo parcial. Terán dereito ao recoñecemento de créditos que proceda, na titulación pola que opten, por aqueles outros superados na titulación que abandonen.

- b) Optar, no prazo que corresponder, por solicitar praza para iniciar os estudos noutra titulación distinta, seguindo as normas e os procedementos de carácter xeral.

Terán dereito ao recoñecemento que proceda, na titulación na que se matriculen, por aqueles outros superados nas titulacións que abandonen.

Art. 13. Recoñecementos específicos para estudantes do dobre grao

1. Ao alumnado que cursar o dobre grao recoñeceráselle os créditos das disciplinas optativas do dobre grao polos créditos das disciplinas obrigatorias que constan no **ANEXO II** desta normativa, logo de superalas e coa equivalencia en puntos correspondente á cualificación obtida nesas disciplinas obrigatorias.

2. O recoñecemento realizarase polo decanato/dirección do centro correspondente. A solicitude do alumno, logo de ser revisada pola administración do centro, resolverase no momento en que o/a estudante supere o total de créditos correspondentes ao plano de estudos do dobre grao, agás os do traballo de fin de grao.

3. Na fase final dos planos de estudos deste programa, unha vez superados cando menos os créditos que establece a normativa vixente, realizaranse dous Traballos Fin de Grao (12 créditos ECTS o correspondente ao Grao en ADE e 6 créditos ECTS o correspondente ao Grao en Dereito) nos que serán de aplicación os coñecementos adquiridos en cursos anteriores. Con estes, o estudante acredita que posúe o dominio do conxunto de competencias xerais e específicas dos dous graos para o desempeño profesional. Estes Traballos de Fin de Grao deberán estar dirixidos por un profesor ou profesores dos departamentos adscritos á Facultade de Economía e Empresa e á Facultade de Dereito.

Art. 14. Expedición dos títulos oficiais de Grao

Os/as alumnos/as deberán solicitar a expedición de cada un dos títulos oficiais: Graduado en Administración e Dirección de Empresas e Graduado en Dereito, ante a Administración da Facultade de Ciencias Económicas e Empresariais e ante a Administración da Facultade de Dereito, respectivamente e pagarán, en concepto de expedición de cada título, os prezos públicos establecidos na correspondente tarifa do Decreto da Xunta de Galicia polo que se fixen os prezos correspondentes aos estudos conducentes á obtención de títulos oficiais no ensino universitario.

Os trámites administrativos que se realizarán en cada unha das Administracións mencionadas serán os mesmos que están establecidos con carácter xeral no procedemento de expedición de títulos oficiais, sen prexuízo de que, por ser a Facultade de Ciencias Económicas e Empresariais a responsable da tramitación e custodia dos expedientes académicos dos alumnos, deberá enviar á Facultade de Dereito, unha vez que cada alumno finalice os seus estudos, a certificación académica asinada que corresponda para que esta poida expedir, por instancia de parte, o título oficial.

Disposición derogatoria. Queda derogada a Normativa específica para a simultaneidade do Grao en Administración e Dirección de Empresas e o Grao en Dereito, aprobada polo Consello de Goberno do 30/06/2009.

Disposición transitoria

Única. Adaptación da dobre Licenciatura en ADE e Dereito: os estudantes que estivesen matriculados da dobre Licenciatura en ADE e Dereito ofertada pola Universidade da Coruña e non finalizasen os seus estudos, poderanse adaptar aos estudos do Programa de Simultaneidade do Grao en Administración e Dirección de Empresas e o Grao en Dereito, se o solicitaren. O recoñecemento de materias do plano de estudo da dobre licenciatura por materia do dobre grao aparece recollido no **ANEXO III**.

Disposicións finais

Primeira: A UDC resérvase o dereito de non ofertar, para promocións sucesivas, o Programa de Simultaneidade de estudos que regula esta normativa se a demanda deste non se correspondese coa oferta académica anual; porén, os alumnos de continuación de estudos terán garantida a posibilidade de finalizalos.

Segunda: Corresponderalle á Vicerreitoría con competencias en Titulacións a interpretación e resolución de cantas cuestións xurdiren en aplicación desta normativa.

Terceira: Para o que non está establecido nesta normativa, os trámites académico administrativos relacionados con estes estudos regularanse pola Normativa de xestión académica correspondente a cada curso académico e polas demais normativas da UDC que resulten de aplicación.

Cuarta: As presentes normas serán de aplicación a partir do curso académico 2017/18.

Normativa específica para a simultaneidade do Grao en Administración e Dirección de Empresas e o Grao en Dereito

ANEXO I

PRIMEIRO:

PRIMEIRO CUADRIMESTRE	Matemáticas I	Principios de Microeconomía	Análise das Operacións Financeiras	Principios de Macroeconomía	Economía da Empresa: Dirección e Organización	Historia Económica
SEGUNDO CUADRIMESTRE	Fundamentos Romanísticos da Cultura Xurídica	España na Configuración Histórico-Xurídica de Europa	Dereito Constitucional: Fontes e Dereitos	Teoría do Dereito	Dereito da Persoa	Dereito Penal, Xeral

SEGUNDO:

PRIMEIRO CUADRIMESTRE	Organización Constitucional do Estado	Dereito da Empresa	Dereito Eclesiástico do Estado	Dereito de Familia	Constitución e Poder Xudicial	Institucións e Ordenamento Xurídico-Administrativo
SEGUNDO CUADRIMESTRE	Matemáticas II	Estatística I	Microeconomía: Mercados e Competencia	Economía Española e Mundial	Contabilidade Financeira I	Introdución Marketing

TERCEIRO:

PRIMEIRO CUADRIMESTRE	Dereito de Obrigas e Danos	Actuación e Bens das Administracións Públicas	Fundamentos de Dereito Financeiro	Dereito Internacional Público	Dereito Sancionador	Dereito do Traballo
SEGUNDO CUADRIMESTRE	Estatística e Introducción á Economía	Política Económica	Macroeconomía e Contorno Empresarial	Contabilidade Financeira II	Teoría do Investimento	Facenda Pública. Sistema Fiscal

CUARTO:

PRIMEIRO CUADRIMESTRE	Dereito da Unión Europea	Dereito Mercantil: Dereito de Sociedades e de Títulos-Valores	Dereito da Contratación	Dereito Penal, Parte Especial	Dereito Procesual Penal	Dereito Tributario
SEGUNDO CUADRIMESTRE	Econometría	Teoría do Financiamento	Contabilidade de Xestión	Análise Económica das Organizacións	Investigacións de Mercados	Dirección Estratéxica e Política Empresarial I

QUINTO:

PRIMEIRO CUADRIMESTRE	Dereito Procesual Civil	Dereitos Reais	Dereito Público Autonómico	Dereito Internacional Privado	Filosofía do Dereito	Dereito Mercantil: Contratos Empresariais. Dereito Concursal e Dereito Marítimo
SEGUNDO CUADRIMESTRE	Contabilidade das Operacións Societarias	Sistemas de Información para a Xestión Financeira da Empresa	Deseño Organizativo	Distribución Comercial	Contabilidade Directiva	Planificación Financeira

SEXTO:

PRIMEIRO CUADRIMESTRE	Dereito de Sucesións	Facenda Pública Española. Sistema Fiscal	Dirección Estratégica e Política Empresarial II	Dirección Comercial	Traballo Fin de Grao (12 ECTS)	
--------------------------	-------------------------	---	--	------------------------	-----------------------------------	--

ANEXO II

A) Os créditos das disciplinas optativas do Grao en ADE recoñeceranse pola superación dos créditos das seguintes disciplinas obrigatorias do Grao en Dereito:

- Dereito da Unión Europea
- Dereito Mercantil: Dereito de Sociedades e de Títulos-Valores
- Dereito Tributario

B) Os créditos das disciplinas optativas do Grao en Dereito recoñeceranse pola superación dos créditos das seguintes disciplinas obrigatorias do Grao en ADE:

- Política Económica
- Macroeconomía e Contorno Empresarial
- Facenda Pública. Sistema Fiscal
- Contabilidade das Operacións Societarias
- Sistemas de Información para a Xestión Financeira da Empresa